



JICA Alumni asocijacija u Bosni i Hercegovini

JICA Alumni asocijacija u Bosni i Hercegovini danas broji 100 članova koje predvode:

Organi Asocijacije:

- Skupština
- Upravni odbor

Predsjednik Udruženja:

- mr Marko Tutnjević

Potpredsjednik Udruženja:

- mr Dunja Pejić

Upravni odbor:

- Melika Brković, predsjednik
- dr Admir Mulahusić, član
- dr Petar Gvero, član
- Ranka Mandić, član
- mr Davor Alagić, član
- Živorad Kovačević, član
- mr Jozo Bejić, član
- Tarik Hadžić, član
- mr Toni Nikolić, član

JICA Alumni asocijacija u Bosni i Hercegovini izražava zahvalnost svima koji pružaju podršku u implementaciji ostvarenih aktivnosti, a prije svega to su:

JICA / naši članovi

JICA Balkan Office's Contact Point in Sarajevo

JICA Balkan Office, Beograd

Ambasada Japana u BiH

Ministarstvo vanjskih poslova BiH

*Kontaktirajte nas,
spremni smo reći Vam više o sebi.
Pridružite nam se!*

www.jicaalumni.ba

Aktivnosti JICA Alumni asocijacije u BiH 2012



JICA Alumni asocijacija u Bosni i Hercegovini

Japan International Cooperation Agency

Radionica

"Promocija i razvoj MSP - inovativne poslovne ideje"

Radionica „Promocija i razvoj MSP – inovativne poslovne ideje“ održana je u prostorijama Inovacionog centra Banja Luka, dana 10.02.2012. godine. JICA je do sada organizovala veliki broj seminara vezanih za promociju malih i srednjih preduzeća (MSP) za polaznike iz Bosne i Hercegovine, pa je UO Udruženja odlučio da započne sa radionicama iz ove oblasti kako bi aktivirao članove da stečena znanja i iskustva iskoriste u svrhu kreiranja određenih aktivnosti koje bi mogle pružiti doprinos ekonomskom razvoju naše zemlje.

Namjera Radionice održane u Banja Luci je bila da se analizira značaj i uloga inovacija u BiH, koje su osnov efikasnosti i konkurentnosti poslovnih subjekata, sa posebnim osvrtom na mala i srednja preduzeća. Radionica je okupila predstavnike akademske zajednice, javnog i privatnog sektora iz ove oblasti, a teme prezentacija i izlagачi su bili:

- g. Dr. Milan Cvijić, sa temom "Politika promocije MSP i preduzetništva u Japanu – japanski dobar menadžment kao osnov za inovacije"
- dr.sc. Zijad Džafić, van.prof. Ekonomskog fakulteta u Tuzli sa temom "Inovativnost MSP u funkciji povećanja konkurentnosti privrede u Bosni i Hercegovini"
- Prof.dr. Jasmin Halebić, Ekonomski fakultet Zenica, sa temom "Mogućnosti Sedmog okvirnog programa EU (FP7) i drugih za unapređenje inovativnosti MSP"
- g. Miroslav Tešić, iz preduzeća "Turbina IPD", je predstavio vlastita iskustva njihovog inovativnog MSP

Diskusija koja se razvila nakon završetka prezentacije bila je vrlo zanimljiva uz aktivan doprinos svih učesnika. Osnovna zapažanja i komentari mogu se svesti na sljedeće:

- Saradnja i koordinacija između institucija za podršku malim i srednjim preduzećima nije zadovoljavajuća, kako horizontalno (unutar istog nivoa vlasti), tako i vertikalno (između različitih nivoa vlasti, tj. u lancu lokalna zajednica / kanton-entitet-država).
- Posebno bi se moralo raditi na jačanju veza između naučno-istraživačkih institucija, kao što su univerziteti i privrednih subjekata.
- Evidentan je problem adekvatne procjene vrijednosti patenta (intelektualnog kapitala), kao dijela osnovne imovine preduzeća, što onemogućava da oni posluže kao kolateral za apliciranje na kreditna sredstva ili da preduzeće prikupi potrebna sredstva putem tržišta kapitala (izlazak na berzu). Na ovaj način dosta inovativnih i kvalitetnih patenata ne može ući u fazu komercijalizacije.
- Potrebno je da država i entitetske vlasti povećaju izdvajanja za naučno-istraživačku djelatnost koja su još uvijek među najnižim u Evropi, zaključak je učesnika radionice.



Radionica "Procjena geološkog hazarda - zemljotresi"

Upravni odbor **JICA Alumni udruženja BiH**, na sastanku održanom u martu 2011. g. se usaglasio da podrži organizaciju radionice posvećene seizmičkim aktivnostima (zemljotresima) u okviru aktivnosti radne grupe "**Geohazardi - seizmika**", a kao nastavak predhodno održane radionice, sa namjerom da inicira projekte i podrži globalne napore vezane za smanjenje posljedica zemljotresa, kako bi se ljudske žrtve i materijalna šteta smanjili na najmanju moguću mjeru i društvo dodatno edukovalo o ponašanju u ovakvim situacijama.

Bosna i Hercegovina se nalazi u veoma rizičnoj zoni mogućih potresa, tako da bi društvo trebalo biti pripremljeno na sve moguće situacije i spremno da se adaptira na novonastalu situaciju. Sudeći prema dosadašnjim podacima, mi imamo veoma slabu infrastrukturu za osmatranje zemljotresa i istu bi trebalo obnoviti i dodatno umrežiti. Znamo koliko je bitno imati prave informacije i reagovati u određenom trenutku, poduzeti dodatne napore u sofisticiranju opreme i institucija, te ojačavanju sa stručnim kadrom, koji će biti spreman da odgovori na svaki izazov koji može uslijediti u budućnosti. Osim toga, trebalo bi, takodje, jačati institucije koje se bore sa posljedicama potresa i rade na sanaciji istih.

U skladu sa gore navedenim, 19. januara 2012.g. u hotelu "Saraj" u Sarajevu je održana radionica "Procjena geološkog hazarda - zemljotresi" uz učešće 13 stručnjaka iz sljedećih oblasti: geologije, seizmologije, geodezije, građevine i međunarodnih projekata, budući da su zemljotresi multidisciplinarni problem. Veliku podršku u realizaciji projekta dale su Ranka Mandić i Melika Brković.

Prije tematskog izlaganja Melika Brković je ukratko predstavila **JICA Alumni BiH** udruženje, kao i ciljeve rada našeg Udruženja.

Mr.sc. Toni Nikolić, projekt koordinator, je nakon tematskog uvoda i odavanja sućuti minutom šutnje stradalim u katastrofalnom potresu u Japanu 2011. godine, prikazao dokumentarni film o potresu u Japanu 2011.g. nakon čega su uslijedila predavanja:

- **Ivana Brleka**, seizmologa iz Federalnog hidrometeorološkog zavoda, Sarajevo na temu "Stanje seizmologije u Federaciji Bosne i Hercegovine"
- **Vesne Šipke**, seizmologa iz Republičkog hidrometeorološkog zavoda, Banja Luka na temu "Seizmološki monitoring Republike Srpske".

Potom je uslijedila aktivna diskusija, tokom koje su razmijenjena različita iskustva učesnika i na kraju donesene preporuke koje se mogu sumirati u četiri grupe:

1. Ideja o formiranju **specijalističkih studija** za određeni broj studenata koji završe dodiplomski studij, tako da bi svaki od srodnih fakulteta u Mostaru, Tuzli, Sarajevu i Banja Luci predložio po 2 kandidata (s tim da bi se predhodno ispitale mogućnosti JICA o podršci ovom projektu i mogućnostima edukacije)
2. Organizacije treninga iz ove oblasti za stručnjake koji se bave seizmologijom u Japanu
3. Mogućnosti organizacije studiranja u Skoplju preko MAK-JAMC (makedonskog JICA Alumni udruženja) uz podršku japanskih predavača, jer se ovaj institut broji kao najjači u regionu
4. Iniciranje dolaska japanskih stručnjaka iz oblasti seizmologije u BiH te na osnovu razmjene saznanja i potreba sa nadležnim institucijama, osmišljavanje projekata koji su najpotrebniji za osavremenjavanje postojećih sistema za praćenje i alarmiranje usljed seizmogenih aktivnosti.



Projekat "Promocija ekološke svijesti"

U Travniku je 20.01.2012. godine, u prostorijama OŠ "Nova Bila" održano predavanje na temu:

"Očuvanje životne sredine - otpad i reciklaža".

Predavanje je održano u okviru projekta "**Promocija ekološke svijesti**" koji je finansirala **JICA**.

Ciljna grupa projekta su bili stariji osnovci i njihovi predavači kao i, posredstvom učenika, njihovi roditelji. Predavanje su pratili učenici dva kombinovana odjeljenja (šesti, sedmi i osmi razred), i članovi ekološke sekcije OŠ "Nova Bila", što u brojkama iznosi šezdeset i osam učenika.

Predavanje su organizovali **Živorad Kovačević** i **Ranka Mandić**, članovi Udruženja **Jica alumni u BiH**, uz svesrdnu pomoć osoblja OŠ "Nova Bila"- Travnik, sa ravnateljem Dragom Marjanovićem na čelu.

Predavanje je proteklo u izuzetno interaktivnoj atmosferi, na temu očuvanja životne sredine, reciklažu i pitana vezana za otpad i odnos prema njemu u sredini u kojoj živimo.

Nakon predavanja g. Slipca, prisutnima su prikazana dva animirana filma prilagođena ciljanoj populaciji.

izuzetnu pomoć u organizaciji navedenog predavanja u OŠ "Nova Bila" pružio je gospodin Drago Marjanović, ravnatelj škole, koji je kao član JICA Alumni BiH i jedan od bivših članova UO JAABiH prepoznao i podržao ideju projekta "Promocija ekološke svijesti".

Uz ravnatelja i ciljanu grupu djece predavanju su prisustvovali i predstavnici lokalne vlasti, lokalnog komunalnog preduzeća, ekoloških udruga, nastavnici biologije koji obrađuju teme iz ekologije na redovnim časovima i nastavnici iz susjednih škola.

Na kraju predavanja podijeljene su prigodne majice sa natpisom:

"Čuvajmo prirodu - čuvajmo naš grad - www.jicaalumni.ba" i leci sa tematikom širenja i promocije ekološke svijesti svim učenicima prve i druge smjene.

Učenici, nastavno osoblje i menadžmet škole su sa zadovoljstvom ispratili predavanje i ostavili otvorena vrata za daljnju saradnju.

